

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкyрeнцијски савјет

Rješenje

po Zahtjevu za pokretanje postupka protiv Guma M d.o.o. Mostar, Bosna i Hercegovina i GA Adriatic d.o.o. Ljubljana, Republika Slovenija podnesenog od strane privrednog subjekta Autohit d.o.o Sarajevo, Bosna i Hercegovina

Postupanje po Presudi Suda Bosne i Hercegovine broj: S1 3 U 044405 24 Uvp

**Sarajevo,
januar, 2025. godine**



Broj: UP-01-26-2-53-66/21
Sarajevo, 30.01.2025. godine

Konkurencijsko vijeće Bosne i Hercegovine, na osnovu člana 32. stav (1) i (2), te člana 42. stav (2) Zakona o konkurenciji („Službeni glasnik Bosne i Hercegovine“ br. 48/05, 76/07 i 80/09) i člana 105. Zakona o upravnom postupku („Službeni glasnik BiH“ br. 29/02, 12/04, 88/07, 93/09, 41/13 i 53/16), a po Zahtjevu za pokretanje postupka privrednog subjekta Autohit d.o.o. Sarajevo ul. Hasana Merdžanovića b.b. 71 320 Vogošća, protiv privrednih subjekata Guma M d.o.o. ul. Bišće polje b.b., 88 000 Mostar i GA Adriatic d.o.o. ul. Dunajska cesta 22., 1 000 Ljubljana, Republika Slovenija, radi utvrđivanja zlouporebe dominantnog položaja u smislu člana 10. stav (2) tačka a), b) i c) Zakona o konkurenciji, zaprimljenog dana 10. decembra 2021. godine pod brojem: UP-01-26-2-53-1/21, na 21. (dvadesetprvoj) sjednici održanoj dana 30. januara 2025. godine, a postupajući po Presudi Suda Bosne i Hercegovine broj: S1 3 U 044405 24 Uvp od 20. decembra 2024. godine, donijelo je sljedeće

R J E Š E N J E

1. U Rješenju Konkurencijskog vijeća Bosne i Hercegovine broj: UP-01-26-2-53-44/21 od 12. oktobra 2022. godine, tačka 3. se mijenja i glasi:
„Nalaže se privrednom subjektu Autohit d.o.o. Sarajevo, ul. Hasana Merdžanovića b.b. 71 320 Vogošća, da nadoknadi troškove postupka privrednom subjektu GA Adriatic d.o.o. ul. Dunajska cesta 22., 1 000 Ljubljana, Republika Slovenija u ukupnom iznosu od 842,40 KM (slovima: osam stotina četrdeset dvije konvertibilne marke i četrdeset feninga) u roku od 8 dana od dana prijema ovog rješenja.“
2. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je, dana 10. decembra 2021. godine zaprimilo Zahtjev za pokretanje postupka, zaprimljen od strane privrednog subjekta Autohit d.o.o. Sarajevo ul. Hasana Merdžanovića b.b. 71 320 Vogošća (u daljem tekstu: Podnosilac zahtjeva ili AUTOHIT), pod brojem: UP- 01-26-2-53-1/21, radi utvrđivanja zloupotrebe dominantnog položaja iz člana 10. stav (2) tačke a), b) i c) Zakona o konkurenciji od strane privrednih subjekata Guma M d.o.o. (u daljem tekstu: GUMA M), ul. Bišće polje b.b. 88 000 Mostar i GA Adriatic d.o.o. ul. Dunajska cesta 22., 1 000 Ljubljana, Republika Slovenija (prethodni naziv Renault Nissan Slovenija d.o.o., u daljem tekstu: GA Adriatic ili Protivna strana).

1. Presuda Suda Bosne i Hercegovine broj: S1 3 U 044405 24 Uvp

Nakon što je proveden cjelokupni postupak Konkurencijsko vijeće je dana 12. oktobra 2022. godine donijelo Rješenje broj: UP-01-26-2-53-44/21 u kojem je odlučilo o Zahtjevu privrednog subjekta Autohit d.o.o. Sarajevo, na način da je zahtjev odbijen kao neosnovan.

Na doneseno Rješenje Podnosilac zahtjeva podnio je tužbu Sudu Bosne i Hercegovine (u daljem tekstu: Sud BiH) pokrenuo upravni spor, koji je okončan Presudom Suda BiH broj: S1 3 U 044405 23 U od 13. marta 2024. godine, na način da je tužba tužioca odbijena. Nezasvoljan donesenom Presudom Tužilac, odnosno Podnosilac zahtjeva pokreće postupak pred Apelacijskim odjelom Suda BiH ulaganjem Zahtjeva za preispitivanje sudske odluke.

Dana 20. decembra 2024. godine Apelacijski odjel Suda BiH donio je Presudu broj: S1 3 U 044405 24 Uvp (u daljem tekstu: Presuda), kojom je tužba djelimično uvažena, te je tačka 3. izreke Rješenja broj: UP-01-26-2-53-44/21 poništena, u dijelu kojim je usvojen zahtjev za naknadu troškova postupka subjektu Renault Nissan Slovenija u iznosu od 3.474,90 KM, te predmet vraća Konkurencijskom vijeću na ponovno rješavanje, dok u preostalom dijelu Rješenje ostaje na snazi (tačke 1. i 2. Rješenja).

Sud BiH u donesenoj Presudi konstatuje, da je navodno nakon donošenja Rješenja Konkurencijskog vijeća privredni subjekt Renault Nissan Slovenija d.o.o. Ljubljana, promijenio naziv društva u GA Adriatic d.o.o. Ljubljana.

2. Troškovi postupka

Postupajući po Presudi Konkurencijsko vijeće je prilikom određivanja troškova postupka uzelo u obzir odredbe Zakona o upravnom postupku, i to član 105. stav (2) Zakona o upravnom postupku, kada u postupku učestvuju dvije ili više stranaka sa suprotnim interesima, stranka koja je izazvala postupak, a na čiju je štetu postupak okončan, dužna je protivnoj stranci nadoknaditi opravdane troškove koji su toj stranci nastali učesćem u postupku.

Prema članu 105. stav (3) Zakona o upravnom postupku troškovi za pravno zastupanje nadoknađuju se samo u slučajevima kad je takvo zastupanje bilo nužno i opravdano.

Konkurencijsko vijeće je prilikom izračunavanja ukupnih troškova postupka uzelo u obzir odredbe Zakona o upravnom postupku, Zakona o advokaturi («Službene novine Federacije BiH» br. 40/02, 29/03, 18/05 i 68/05) i Tarife o nagradama i naknadi troškova za rad advokata («Službene novine Federacije BiH» br. 22/04 i 24/04) (u daljem tekstu: Tarifa).

Na osnovu navedenog, punomoćnik privrednog subjekta GA Adriatic je dana podneskom broj: UP-01-26-2-53-36/21 dana 21. maja 2022. godine, dostavio troškovnik u ukupnom iznosu od 2.970 bez PDV-a, i to za odgovor na Zahtjev za pokretanje postupka 990 KM, učešće na Usmenoj raspravi 990 KM, i izjašnjenje nakon usmene rasprave 990 KM, a što ukupno iznosi 3.474,90 KM sa uključenim iznosom PDV-a. Kako je navedeno troškovnik je izrađen prema vrijednosti prosječne plaće od 990 KM, budući da se vrijednost pravne radnje ne može obračunati više od vrijednosti prosječne plaće u datom periodu.

Konkurencijsko vijeće je GA Adriatic priznalo samo troškove zastupanja koji su bili nužni i opravdani u ovom postupku, pa je u skladu sa članom 18. i 33. Tarife, utvrdilo kako se u ovom slučaju radi o predmetima u kojem se ne može odrediti vrijednost, te je relevantna odredba Tarife koje propisuju nagradu za podneske kojima se pokreće upravni postupak u neprocjenjivim predmetima, utvrdilo i priznalo slijedeće troškove za rad advokata punomoćnika GA Adriatic i to:

- za sastav odgovora na Zahtjev za pokretanje postupka u iznosu 240 KM sa uračunatim PDV -om od 17% iznosi 280,80 KM (kod neprocjenjivih predmeta nagrada iznosi 80 bodova x 3 KM = 240,00 KM),
- pristup na usmenu raspravu dana 6. juli 2022. godine u iznosu od 240 KM sa uračunatim PDV -om od 17% iznosi 280,80 KM i
- podnesak sa činjeničnim navodima od 20. srpnja 2022. godine u iznosu 240 KM sa uračunatim PDV -om od 17% iznosi 280,80 KM.

Advokatski troškovi privrednog subjekta GA Adriatic sa uračunatim PDV-om od 17% iznose 842,40 KM.

Na osnovu svega navedenog Konkurencijsko vijeće je odlučilo kao u tački 1. dispozitiva ovoga Rješenja.

3. Pouka o pravnom lijeku

Protiv ovoga Rješenja nije dozvoljena žalba.

Nezadovoljna stranka može pokrenuti Upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovoga Rješenja.

Predsjednik

Ivo Jerkić

Dostaviti:

- Autohit d.o.o, putem punomoćnika
- GA Adriatic d.o.o., putem punomoćnika,
- Guma M d.o.o., putem punomoćnika, i
- U spis;